

бѣ нашъ · бѣ спсати · ты ны научи бл҃годарити та достоинно · ѿ бл҃гѣи^тхъ твоихъ дѣлѣхъ · ꙗже сътвори^лъ єси и твориши съ нами · ты бѣ нашъ прими дары сѣи · ѿчисти ны ѿ всакоѣ скверны · плѣтскыѣ и дх~~вныѣ~~^{тѣлныѣ} · и научи ны творити ст҃ыню въ страсѣ твоѣмъ · да чистѣмъ съвѣдѣтельствомъ съвѣсти нашеѣ · приемлюще часть ст҃ынь твоихъ · съвѣкупимъсѣ съ ст҃ымъ тѣломъ твоимъ · и крѣвью х҃а твоего · и приемъше ꙗ достоинно · да имамъ х҃а живуща въ срд҃цѣхъ нашихъ · и да будѣмъ цр҃кы прѣсто мѹ дх҃ѹ · єи бѣ нашъ · и ни єдино҃го насъ повинна сътвори · страшынымъ твоимъ таинамъ · ꙗ^{кѡ} и небынымъ таинамъ · ни немощна дѣю и тѣломъ · зане недостойно приемлемъ ѿ нихъ · нѣ дажѣ намъ до послѣднѣаго ~~вѣ~~здыханѣа нашего · достоинно приимати · ѹпѣвание ст҃нь твоихъ · въ дошѣствие жизни вѣчнныѣ · въ ѿвѣтъ бл҃гоприѣтно · на страшынѣмъ сѹдищи х҃а твоего · да и мы съ всеми ст҃ми ѹгожешиими тебе ѿ вѣка · будѣмъ причастьници вѣчныихъ твоихъ бл҃гъ · ꙗже ѹготовалъ єси любящимъ та ги · ∴·